

共同經課 - 1

創世記三十七章一節~四節，十二節~二十八節

1 雅各 khiā 起迦南地，就是伊 ê 老父寄腳 ê 所在。2 雅各 ê 世系記 tī 下底。約瑟十七歲 kap 伊 hiah-ê 兄相 kap 顧羊；伊是一個 gín-á kap 伊 ê 老父 ê 細姨 Phek-láh ê kiáⁿ, Sek-phàⁿ ê kiáⁿ, 常常做陣；約瑟將伊 hiah-ê 兄 ê pháiⁿ 品行 kā in 老父講。3 Taⁿ 以色列疼約瑟 khah 贏過 tī 疼伊 ê 眾 kiáⁿ, 因為約瑟是伊年老生 ê；伊 kā 伊做一領彩色 ê 衫。4 約瑟 hiah-ê 兄看見老父疼約瑟，過頭 tī 疼 in；就怨恨約瑟，boē 會 kap 伊講和睦 ê 話。12 約瑟 ê 兄去示劍，飼老父 ê 羊。13 以色列 tùi 約瑟講，Lín hiaⁿ kiám m̄ 是 tī 示劍飼羊 mah？你來，我 beh 差你去 in hia。14 伊應講，我 tī-chia。伊 kā 伊講，你去看 lín 兄有平安 á 無，羊群有平安 á 無；tò 來 kā 我講。就差伊出 Hi-pek-lún ê 山谷；伊就去到示劍。15 有人 tng-tiòh 伊 tī 山裡迷路；就問伊講，你 teh chhē 甚麼？16 伊講，我 teh chhē 我 ê 兄；請 kā 我講，in tī tah-lóh teh 飼羊。17 hit 人講，In 已經離開 chia；因為我聽見 in teh 講，咱來去 To-tan。約瑟就去 jip 伊 ê 兄，tú-tiòh in tī To-tan。18 In 遠遠看見伊，伊 iáu 未行到 in hia，in 就相 kap 計謀 beh 害死伊。19 大家相 kap 講，你看，做夢 ê 來 lah。20 Hò 來，taⁿ 咱 kā 伊 thài 死，hiatti7 一個乾井；chiah 來講有 pháiⁿ-siù 食伊；咱 chiah 看伊 ê 夢將來怎樣。21 Liù-piān 聽見，就救伊脫離 in ê 手；講，咱 m̄-thang 害伊 ê 性命。22 Liù-piān koh 對 in 講，M̄-thang hō 伊流血；thang kā 伊 hiat tī chit-ê 曠野 ê 乾井，m̄-thang 下手害伊；意思是 beh 救伊脫離 in ê 手，hō 伊 tò 去伊 ê 老父 hia。23 約瑟到伊 ê 兄 hia，hit-tiáp in 就 thng 約瑟 ê 外衫，就是伊身軀 hit 領彩色 ê 衫；24 就掠伊，hiat 落井，hit-ê 井是乾 ê，內面無水。25 In 坐 teh 食餅；kiáh 目看，看見一 tīn 以實瑪利人 tùi Ki-liát 來；用駱駝背香料，乳香，沒藥，beh 帶落去埃及。26 猶大對 chiah-ê 兄弟講，咱 thài 死咱 ê 小弟，khng 密伊 ê 血，有甚麼利益？27 咱來 kā 伊賣 hō 以實瑪利人；m̄-thang 下手害伊；因為伊是咱 ê 小弟，咱 ê 骨肉。兄弟聽伊。28 有 hiah-ê 米甸 ê seng-lí 人 tùi hia 過，伊 ê 兄就 kā 約瑟 tùi 井內拔起來，將伊賣 hō 以實瑪利人，得 tiòh 二十個銀。Hiah-ê 人就帶約瑟去埃及。

共同經課 - 2

詩篇一百零五篇一節~六節，十六節~二十二節，四十五 b 節

1 Lín tiòh 感謝耶和華，求叫伊 ê 名；Tī 萬百姓 ê 中間報揚伊 ê 所做。2 Tiòh òng 伊詩，òng 伊唱歌 o-ló，談論伊一切奇妙 ê 所行。3 Tiòh 因為伊 ê 聖名來誇口；Chhē 耶和華 ê 人，心內 tiòh 歡喜。4 Tiòh 求耶和華 kap 伊 ê 權能；常常 chhē 見伊 ê 面。5 伊 ê 奴僕亞伯拉罕 ê 後裔，伊所揀雅各 ê kiáⁿ 孫 ah，Lín tiòh siàu 念伊所做奇妙 ê 事，Kap 伊 ê 神跡，kap 伊 ê 嘴判斷 ê 話。6 b, 16 伊命令飢荒降落 tī hit-ê 土地；將所 oá 靠 ê 米糧，一概斷絕。17 伊 tī in ê 頭前差一人去；約瑟受 boē 做奴僕；18 人用腳銬傷伊 ê 腳，伊受鐵鏈纏縛；19 耶和華 ê 話試煉伊，直到伊所講 ê 應驗。20 王差人 kā 伊 tháu 開，就是治理百姓 ê，kā 伊 tháu 放；21 設立伊做王-ka ê 主，管理伊一切所有 ê，22 Thang 隨意縛伊 ê 人臣，將智慧教示伊 ê 長老。45 Lín tiòh o-ló 耶和華。

共同經課 - 3

羅馬書十章五節~十五節

5 因為摩西寫講，人行 hit-ê tù 律法 ê 義 ê，beh tù 伊來活。6 但是 tù 信 ê 義是親像 án-ni 講，你莫得心內講，Chī-chūi beh 上天 ah？(就是 beh chhoā 基督落來)；7 á 是，Chī-chūi beh 落深淵 ah？(就是 beh chhoā 基督 tù 死人中起來)8 伊到底講甚麼 ah？是講，言語是近 tī 你，是 tī 你 ê 嘴，tī 你 ê 心，就是阮所傳 chit-ê 信 ê 言語；9 就是你若用嘴認耶穌做主，用心信上帝 hō 伊 tù 死人中起來，就會得 tiòh 救。10 因為人用心信，致到得 tiòh 義；用嘴認，致到得 tiòh 救。11 聖經講，見若信靠伊 ê 人不致見笑。12 因為猶太、希利尼 lóng 無分別；siāng 一個主是眾人 ê 主，款待 lóng 總求伊 ê 人極其富裕。13 因為見若求叫主 ê 名 ê 人 beh 得 tiòh 救。14 總是 in 所 iáu-未信 ê，thái-thó 會求叫伊？所未聽見 ê，thái-thó 會信伊？若無人傳，thái-thó 會聽見？15 若 m̄ 是奉差，thái-thó 能傳？照所記載講，傳 chiah-ê 好事 ê 福音 ê，in ê 腳步 sui 到怎樣！

共同經課 - 4

馬太福音十四章二十二節~三十三節

22 伊隨時逼學生上船，事先過去 hit pêng，thèng 候伊四散眾人。23 四散眾人了後，就家已上山祈禱；已經暗，只有伊家已 tī hia。24 Hit 時船 tī 海中，hō 湧搖 choah；因為是對頭風。25 暝時四更，耶穌 tù 海面行，就近 in。26 學生看見伊行 tī 海面，就生驚，講，是怪物；因為驚就喉叫。27 耶穌 liām-piⁿ kap in 講話，講，安 lín ê 心；是我；m̄ 免驚。28 彼得應伊講，主 ah，果然是你，就命令我行水面就近你。29 伊講，來。彼得就 tù 船裡落去，行水面，beh 就近耶穌。30 總是看見風，就驚；teh-beh 沉落去，就喉叫講，主 ah，救我。31 耶穌隨時伸手牽伊，講，小信 ê 人，啥事僥疑？32 In 上船，風就定。33 船裡 ê 人拜伊講，你真正是上帝 ê Kiáⁿ。